

**Claustra Glion****Co pudessi ir vinavant cun la «Casa Vinavon»?**

La claustra dominicana da Glion sa fatschenta cun l'agen avegnir. Las soras èn adina pli paucas e lur bajetgs vegnan adina pli vids. Cun l'exposiziun «Anavon Casa Vinavon» dat la claustra la pussaivladad a studentas e students da preschentar lur lavurs d'architectura.

2024-11-11,

Co pudess la «Casa Vinavon» ch'è l'antieriura scola da puras, vesair or en l'avegnir? Tge diever pudess il bajetg avair? Co pudess ins mantegnair tscherts elements dal bajetg existent? Quai las dumondas che las studentas ed ils students da la Scola auta spezialisada dal Grischun han gi da reflectar per concepir lur projects d'architectura. 18 models tridimensiunals cun ina legenda explicativa spetgan las visitadras ed ils visitaders da l'exposiziun.

La finamira da quell'exposiziun è tranter auter da mussar las lavurs da las studentas e dals students – ed era d'inspirar la glied cun ideas per sviluppar vinavant. Autur: sora Annemarie priura generala e presidenta da la fundaziun da las Dominicanas

Il gir duai er mussar a la glied tge che la claustra ha uschiglio anc da porscher. L'exposiziun maina da l'entrada tar il café, tras ils sulers en il tract da scola enfin ils locals da segiurn.

Projects socials predomineschan, er sche quai n'era betg la premissa da diever per las studentas ed ils students. Tge diever ch'il bajetg duess avair n'era betg definì. Ch'i ha alura dà projects sco ina chasa da naschienscha, ina clinica per personas cun burnout ni in dachasa per glied cun impediments, plascha a la sora Annemarie, la priura generala e presidenta da la fundaziun da las Dominicanas. Il connex cun l'istorgia e la vischinanza da la claustra fetschia plaschair ad ella.

Igl è stà bel, cunquai che nus avain formulà la dumonda fitg averta. Uschia hai dà differents projects nua che mintgin ha pudì integrar sia vista persunala. Autur: Larissa Good anteriura studenta en archeologia SAS

Las studentas ed ils students che han terminà lur studi da bachelor èn er stads libers pertutgant restricziuns da la lescha da bajegiar. I saja stà impurtant da crear insatge che maina tar ideas cuntinuantas, uschia l'architect e docent Urs Padrun che ha accumpagnà ils students tar quella lavur.

Las studentas ed ils students ston observar l'istorgia – pia tge è stà, tge è ussa e co san ins sviluppar insatge vinavant. Autur: Urs Padrun architect e docent a la SAS


L'exposiziun che cuzzà enfin il matg 2025 è uschia ina plattform per las studentas ed ils students da preschentar lur lavurs. E las soras dominicanas mussan cun il gir tras la claustra ils bajetgs – forza era a tala glied che vul en l'avegnir investir en novs projects sin la spunda da Quinclas. Las soras demussan er ch'ellas planiseschan lur sfidas per l'avegnir cun in spiert creativ. In zic sco architectas.



Legenda:



Legenda:



Legenda:



Legenda:



Legenda:



Legenda:



Legenda:



Legenda: